



Rendaquint 2015

La suprastanza cumünala ha repassà detagliadamaing il rendaquint 2015 insembel cul revisur extern da l'uffizi da cumüns dal Grischun e cun commembers da la cumischiun sindicatoria. Il rendaquint es gnü approvà e deliberà a man da la radunanza cumünala dals 27 gün 2016.

Alp Zeznina Dadaint - lavurs da mantegnimaint

Per far lavurs da mantegnimaint aint l'Alp Zeznina a Lavin sun gnüdas surdattas las lavurs a seguaintas firmas: lavurs d'impressari ad Andri Margadant, Susch; lavurs da cuvratets e lavurs da falegnam a Foffa Conrad Holzbau AG, Zernez; lavurs da fanestras in lain a Peider Müller, Susch; lavurs d'electricier a la Electra Buin SA, Zernez e lavurs da sanitari a Di Tommaso Gebäudetechnik, Susch.

Sarinera nouva a Brail - surdatta da lavurs

In connex cullas lavurs dal rimpazzamaint da la sarinera a Brail es gnüda surdatta la lavur per la furniziun da la balantscha da regulaziun da l'affluent a la firma BGU Umweltschutzanlagen GmbH a Bretzfeld in Germania. L'incumbenza per elavurar ün concept da terra e parasajettas es gnüda surdatta a la Electra Buin SA a Zernez.

Provedimaint electric Lavin - dret da passagi cun lingias

La suprastanza cumünala ha concess il dret da passagi per cha la EE – Energia Engiadina SA possa metter suot terra la lingia da forz'electricica sün pütas tanter Pragliver, sur l'areal da l'Arsenal, traversand la via chantunala fin da tschella vart da la via.

Adattamaints via chantunala tras Susch

L'uffizi da construcziun bassa da Grischun prevezza da refar la vetta d'asfalt da la via chantunala tras la fracziun da Susch. Ils cuosts per l'adattamaint da vierchels da vascas e dal provedimaint d'aua ha da surtour il Cumün da Zernez. Il credit necessari es gnü deliberà.

Sauaziun cun l'aua da la Val Lavinuoz

La dumonda da la società da sauaziun Crusch a Lavin, da pudair far adöver da l'anterior provedimaint d'aua da la Val Lavinuoz per la sauaziun, es gnüda acconsentida. Üna dumonda da contribuziun finanziaria percenter ha stuvü gnir refusada.

Sanaziun/ingrondimaint chasa da scoula a Zernez - models da gess pel proget da pilot II

Las lavurs per scriver oura il stüdi per la sanaziun respectiv l'ingrondimaint da la chasa da scoula a Zernez sun a fin. Per cuntinuar cul proget es gnüda surdatta l'incumbenza per prodüer models da gess dals contuorns intuorn la chasa da scoula.

Restructuraziun da l'anterior Center cumünal Muglinas a Susch

In connex culs sclerimaints da l'indschegner regard la foura per l'ascensur ha tal constatà chi sun gnüts fats müdamaints considerabels vi da la structura portanta pro l'ultima restructuring da l'abitacul. Insembel culs müdamaints actuals illa chasa han quistas lavurs da gnir tuttas davo per uschè pudair garantir la sgürezza cunter terratrembels. Il credit supplementar per quistas lavurs indispensablas es gnü concess. I's tratta impustüt da lavurs da mürader chi nu d'eiran calculadas pro la dumonda da credit i'l rom dal preventiv 2016. La lavur per eriger üna balüstrada sül tet plat sur la garascha es gnüda surdatta a la firma HABITAT Metallbau GmbH a Schlarigna. Quista balüstrada plü ota co quella existenta ha da gnir fatta per pudair tgnair aint las prescripziuns dal post da cussagliaziun per la prevenziun d'accidaints (BFU).

Radunanza cumünala dals 27 gün 2016

La suprastanza cumünala ha approvà la glista da tractandas per la radunanza cumünala dals 27 gün 2016. A quista radunanza vain preschantà il rendaquint 2015. Ün'ulteriura tractanda es il proget cun la dumonda da credit per la sanaziun dal provedimaint da chalur a distanza in Cul a Zernez. Includ in quist proget sun eir cuosts per adattamaints vi da la halla actuala da ziplas a favur da las gestiuns tecnicas, forestalas e dals pumpiers.

Ouvra electrica Vallatscha

La suprastanza cumünala ha surdat al büro d'indschegner Caprez SA a Zernez ün'incumbenza per ün stüdi e preproget per la realisaziun d'ün'ouvra electrica pitschna cun trar a nüz il provedimaint da l'aua da baiver chi maina oura da la Val Sarsura. Quist stüdi serva lura eir a l'inoltraziun per la dumonda da fabrica per fabricats dadour las zonas da fabrica (BaB).

Pumpiers Zernez – acquist d'ün auto-cisterna

La radunanza cumünala vaiva acceptà in november 2015 il credit per l'acquist d'ün auto-cisterna nouv pels Pumpiers Zernez. La suprastanza cumünala ha acceptà la proposta dal cumond da pumpiers e deliberà il credit per l'acquist da l'auto-cisterna chi vain furni da la firma Rosenbauer AG ad Oberglatt. Il Cumün da Zernez po far quint cun üna contribuziun da la sgüranza d'edifizis chantunala (GVG) da 30% per l'acquist da l'auto-cisterna.